



Premier Eman ta indica cu Bushiri ta beach publico mescos cu Arashi



ORANJESTAD(AAN): Fin di siman Prome Minister Mike Eman a bishita area di Bushiri Hotel, despues cu el a anuncia e decision cu a tuma den Consejo di ministronan siman pasa. E decision ta encera cu cu ta kita e edificio y destina elugar aki como un area pa recreacion publico y un beach cu acceso pa publico.

Durante e bishita cu Minister Eman a haci na loka tabata un tempo Bushiri Hotel, el a worde acompaña pa, entre otro, arkitekto Rafy Kock. Segun Eman, a scoge e hoben arkitekto pa diseña e espacio publico nobo aki pa pueblo di Aruba. Eman a splica di ta contento di por a tin ingeniero Kock den e proyecto aki, pa motibo cu tin un bon experiencia di su trabao. Den pasado e hoben arkitekto aki a diseña Linear Park, cu a resulta den un proyecto espectacular pa recreacion publico pa pueblo. "Y ainda nos ta desaroyando Linear Park como espacio publico," Minister Eman a splica, mustrand riba e ekiponan pa ehercicio cu ta instalando riba henter Linear Park.

Prome Minister Mike Eman a splica cu, tempo e gobierno anterior a destina un di e

ultimo pida beach publico pa construccion di Ritz Carlton, nos no tabata contento. "Un Ritz Carlton ta un joya pa Aruba, pero e mester a reemplasa un hotel existente y no tuma un di e ultimo beachnan publico," Eman a enfatisa, "pero esey ta historia y awor nos tin e oportunidad di corig e eror di e gobierno anterior, dunando pueblo un area back cu tabata hotel y debolbe como un beach publico." Prome Minister a splica cu e area ta bay bira un area similar na Arashi y Linear Park. Un beach cu acceso publico, pero cu ta inclui aspectonan di recreacion y un diseño atractivo pa henter famia. El a sigui splica cu ta pensando riba areanan pa deporte den aire liber. Aki por pensa riba facilidatnan deportivo. E idea principal ta cu e ta bira un luga di recreo pa henter famia, di chikito te grandi y den aire liber. Hunto cu arkitekto Kock, sr. Eman a splica, cu ta explorando tambe e posibilidad pa inclui un 'skate park'.

Minister President Mike Eman a bisa cu gobierno kier realisa e proyecto aki cu contribucion boluntario di pueblo. "Manera nos a rescata

Bestuurskantoor den nos prome luna di gobernacion. E tempo ey Aruba a bini hunto di un manera boluntario pa salba un patrimonio historico y di pueblo henter. Mescos nos t'ey haci aki. "Hopi ta esnan cu a y ta acercando Prome Minister Eman caba cu idea riba nombenan historico di e diferente partinan di e costa na altura di Bushiri, manera "Mambo Beach" y otronan. Hopi kier duna contribucion den forma di e mata pa planta na elugar, yuda cu e areanan di recreacion y deporte na elugar. "Na elugar mes tin hopi mata cu nos ta bay percura pa salba y duna un chens nobo pa sigui crece como parti di e parke." E area tin ainda hopi mata di druif cu ta bastante afecta pa falta di cuidu, tambe matanan di coco, pero cu tambe mester atencion rapido.

"Nos lo cuminsa di biaha. Tin un entusiasmo grandi pa cu e decision aki," Minister President Mike Eman a splica, claramente entusiasmo cu e apoyo cu e y su gabinete ta haya pa e decision di haci Bushiri un area publico cu acceso liber pa lama, cu acomodacionnan pa deporte y recreo pa tur famia na Aruba.